

# TULAFONO TAU FAAOFI O LE KAMUPANI A LE LANDING LTD 2016

## SAMOA

### Faamatalaga e Faamalamalama ai

#### 1.0 Sini autu ma mafuaaga:

- 1.1 Ua talosagaina i le Tulafono Tau Faaofi le faatulafonoina o aiaiga ma faatulagaga ua maea ona i ai i le maliega i le va o le Malo o Samoa ma le Kamupani o le Endemol Shine Australia Pty Ltd (Kamupani mai Fafo) e uiga i le tuufaatasia ma le pueina o le Ata Tifaga Faasolo Nu.1 o le Australian Survivor mo le Televise i totonu o Samoa (Australian Survivor).
- 1.2 O le sini autu o le Tulafono Tau Faaofi o le aiaia lea o faiga faatosina faapisinisi mo lafoga, tiute ma tupe toe faafoi mo le pueina ma le tuufaatasiga o le ata tifaga o le Australian Survivor i totonu o Samoa.

#### Fuaiupu:

### VAEGA 1 - FAATOMUAGA


- Fuaiupu 1: - ua aiaia ai le igoa puupuu ma le amataga.
- Fuaiupu 2: - ua aiaia ai mo le faamatalaina o fuaitau o lo o faaaogāina i totonu o le Tulafono Tau Faaofi.
- Fuaiupu 3: - ua noatia ai le Malo.

## VAEGA 2 - FAIGA FAATOSINA FAAPISINISI O LAFOGA, TIUTE MA TUPE TOE FAAFOI

- Fuaiupu 4:** - ua aiaia ai mo tiute a le Malo e totogi ai se tinoitupe o lafoga e toe faafoi e 30% o le Tupe Alu Talafeagai mo le Pueina o Ata Tifaga i totonu o Samoa (QSPE). O le tinoitupe o lafoga e toe faafoi e ao ona totogiina i totonu o le 7 aso faigaluega i le maea ai ona faasalalauina i luga o le 'ea o le vaega muamua o le Survivor Samoa i totonu o Ausetalia. Ua aiaia ai foi mo tulaga e aliae mai pe afai e oo atu i le taimi e faasalalau ai i le ea le vaega muamua o le Survivor Samoa o lo o faaauau pea le pueina ma le sueina faasuetusi o le polokalame ma e lē tatau ona sili atu le tinoitupe o lafoga toe faafoi i le SAT5.7 miliona. O le fua faatatau o fesuiaiga o tupe mo le QSPE e AUD\$0.5333.
- Fuaiupu 5:** - ua tuusaunoa ai se tagata faigaluega mai fafo a le Kamupani mai Fafo, ma se tagata o lo o faigaluega po o galue faakonekarate mai fafo atu o Samoa mo le Kamupani mai Fafo. O tuusaunoaga mai lafoga o tupe maua e lē faaaogāina i se tagata o nofomau i Samoa.
- Fuaiupu 6:** - ua aiaia ai mo tuusaunoaga o totogifuapauina mo galuega ma talosaga o pemitā malaga a le Kamupani mai Fafo po o le Kamupani i Totonu o le Atunuu i lalo o le Tulafono o Sootaga Va Lelei o Leipa ma Galuega 2013 ma le Tulafono o le Ulufale mai o Tagata 2004. Ua aiaia ai foi le tiute tauave o le Kamupani mai Fafo e tuuina atu auiliiliga o ana tagata faigaluega e pei o igoa atoa ma isi tulaga faapena i Minisita e fitoitonu ma Tulafono ua taua i luga.
- Fuaiupu 7:** - ua tuusaunoa ai oloa faaulufale mai ua taua i le Faamatalaga 2 ma aiaia ai malosiaga o le Minisita mo tupe maua e teuteuina ai le lisi i lalo o lea Faamatalaga. O le a lē aafia i le teuteuga tuusaunoaga e faasino i so o se oloa faaulufale mai ua aveeseina ona o se taunuuga o le teuteuga.

### VAEGA 3 - AIAIGA ESEESE

- Fuaiupu 8:** - ua faasaina ai le faatau atu po o le aveina faameaalofa o oloa faaulufale mai vagana ai o se uluai faamaoniga tusitusia e tuuina atu e le Ofisa Sili o Pulega.
- Fuaiupu 9:** - ua aiaia ai le tiute tauave o le Kamupani i Totonu o le Atunuu e tuuina atu ai (i le faaiuga o vaiaso tailua i le maea ai ona pueina le ata) se lipoti o tupe alu e ao ona sueina faasuetusi e le Ofisa Sili o Pulega ma tali atu i so o se fesili e uiga i le lipoti ua sueina faasuetusi e le Ofisa Sili o Pulega. Ua faapea foi ona aiaia ai le tiute tauave o le Ofisa Sili o Pulega e saunia ai se lipoti ua maea ona sueina faasuetusi e faailoa ai pe o usitaia aiaiga o le Tulafono.
- Fuaiupu 10:** - ua aiaia ai mo teuteuga faatupulaia e faia i le Tulafono o Lafoga o Tupe Maua 2012 e ala i le teuteuina o le Faamatalaga 2 o lea Tulafono.
- Fuaiupu 11:** - ua tuuina atu ai i le Minisita mo tupe maua le malosiaga e filifili ai se aso e muta ai le aogā o le Tulafono e ala i se Faasilasilaga e lomia faasalalau i totonu o le Savali i le taimi lava lea e maea ai le faamoemoe o le Tulafono ua talosagaina, faatasi ai ma le usitaia uma o ona aiaiga. Ua soloia le teuteuga ua faia i le Faamatalaga 2 o le Tulafono o Lafoga o Tupe Maua 2012 mai le aso e muta ai le aogā o le Tulafono ua talosagaina.
- Faamatalaga 1:-** ua aiaia ai mo le lisi o tupe alu faapitoa ua iloiloaina a le QSPE.
- Faamatalaga 2:-** ua aiaia ai mo le lisi o oloa faaulufale mai ua tuusaunoaina.



(Hon TIALAVEA Fea Leniu Tionisio Hunt)

**MINISITA MO TUPE MAUA**

**TULAFONO TAU FAAOFI O LE KAMUPANI  
A LE LANDING LTD 2016**

**SAMOA**

**Faatulagaina o Aiaiga**

**VAEGA 1  
FAATOMUAGA**

1. Igoa puupuu ma le amataga
2. Faamatalaina o uiga o upu
3. O le Tulafono e noatia ai le Malo

**VAEGA 2  
FAIGA FAATOSINA FAAPISINISI O LAFOGA,  
TIUTE MA TUPE TOE FAAFOI**

4. Tinoitupe toe faafoi
5. Tuusaunoaga o lafoga o tupe maua
6. Tuusaunoaga i totogifuapauina mo galuega ma pemitā malaga
7. Tuusaunoaga i oloa faaulufale mai

**VAEGA 3  
AIAIGA ESEESE**

8. Faatapulaaina o le faatauina atu po o le aveina atu faameaalofa o oloa faaulufale mai
9. Lipoti ma faamatalaga tau tupe
10. Teuteuga faatupulaia
11. Mutaaga o le Tulafono

Faamatalaga

---

**2016, Nu.**

**O SE TULAFONO TAU FAAOFI UA TAU**

**O SE TULAFONO** e aiaia ai mo faiga faatosina faapisinisi mo lafoga, tiute ma tupe toe faafoi mo le pueina i totonu o Samoa o le Ata Tifaga Faasolo Nu.1 o le Televisi a le Australian Survivor 2016 ma mo faamoemoega e fesootai i ai.

**UA FAIA** e le Fono Aoao Faitulafono a Samoa i totonu o le Palemene ua potopoto e faapea:

## VAEGA 1 OTOOTOGA

### 1. Igoa puupuu ma le amataga:

E mafai ona taua leni Tulafono o le Tulafono o le Kamupani a le Landing Ltd 2016 ma e amata faamamaluina i le aso 4 o Ianuari 2016.

### 2. Faamatalaina o uiga o upu:

I totonu o leni Tulafono, ae vagana ai ua manaomia e le mataupu se isi uiga e ese ai:

**“Fesootaiga Fefaasoai o Faasalalauga”** o lona uiga o Fesootaiga Fefaasoai a le Kamupani a le TEN Pty (ABN 91 052 515 250), o se kamupani ua tuufaatasia faaletulafono i totonu o Ausetalia, i le 1 Saunders Street, Pyrmont NSW 2009;

**“Ofisa Sili o Pulega”** o lona uiga o le Ofisa Sili o Pulega e fitoitonu ma tupe maua ma auaunaga tau tiute;

**“lafoga o tupe maua”** o lo o i ai lona uiga i totonu o le Tulafono o Lafoga o Tupe Maua 2012;

**“Kamupani i Totonu o le Atunuu”** o lona uiga o le kamupani ua tuufaatasia faaletulafono ua taua o le Landing Ltd i lalo o le Tulafono o Kamupani 2001;

**“Minisita”** o lona uiga o le Minisita e fitoitonu ma tupe maua ma auaunaga tau tiute;

**“Kamupani Mai Fafu”** o lona uiga o le kamupani ua tuufaatasia faaletulafono i totonu o Ausetalia e taua o le Endemol Shine Australia Pty Limited;

**“pueina o ata tifaga”** o lona uiga o le pueina i totonu o Samoa o le Ata Tifaga Faasolo Nu.1 o le Australian Survivor mo le Televisi;

**“Tupe Alu Talafeagai mo le Pueina o Ata Tifaga i totonu o Samoa (QSPE)”** o lona uiga o tupe alu e faatupulaia a le Kamupani i Totonu o le Atunuu po o le Kamupani mai Fafu i le pueina o le ata tifaga mo, po o ua avea ma saofaga talafeagai i:

- (a) fanua i Samoa ua faaaogāina mo faamoemoega o le pueina ai o le ata tifaga;
- (b) oloa po o auaunaga o lo o i Samoa e faaaogāina mo le faamoemoe o le pueina ai ma le faia o le ata faasolo o le televise;
- (c) oloa po o auaunaga mai fafo pe e le o maua i Samoa ua faatupulaia a o faagasolo le vaitaimi e pueina ai le ata tifaga a o i ai i totonu o Samoa.

**“tagata nofomau”** e i ai lona uiga i totonu o le Tulafono o Lafoga o Tupe Maua 2012.

**3. O le Tulafono e noatia ai le Malo:**

O lenei Tulafono e noatia ai le Malo.

**VAEGA 2**  
**FAIGA FAATOSINA FAAPISINISI O LAFOGA,**  
**TIUTE MA TUPE TOE FAAFOI**

**4. Tinoitupe toe faafoi:**

- (1) E ao i le Malo ona totogi i le Kamupani i Totonu o le Atunuu se tinoitupe o tupe toe faafoi e 30% o Tupe Alu Talafeagai mo le Pueina o Ata Tifaga i Samoa e pei ona faatulaga atu i le Faamatalaga 1.
- (2) O tinoitupe toe faafoi i lalo o le faafuaiupu (1):
  - (a) e totogiina i totonu o le 7 aso faigaluega i le maea ai ona faasalalauina le vaega muamua o le Ata Faasolo 1 o le Australian Survivor mo le Televisi i totonu o Ausetalia, lea na pueina i totonu o Samoa i lalo o lenei Tulafono;
  - (b) afai e faasalalauina le vaega muamua o le ata i se taimi a o lo o faaauau pea le pueina ma le sueina faasuetusi, ona faapea lea -
    - (i) e totogi le aofai atoa faamaonia ua faatupulaia e tusa ai ma le suega faasuetusi ua maea i le taimi na faasalalauina ai le vaega muamua, i totonu o le 7 aso faigaluega na faasalalauina ai i luga o le ea le vaega muamua o le ata; ma
    - (ii) tupe o totoe ua tatau ona totogi ma totogiina i totonu o le 7 aso faigaluega o le sueina taitasi faasuetusi mulimuli ane seia oo i sea taimi e maea ai le pueina o le ata po o, le totogiina atoa o le aofaiga o lo o taua i le parakalafa (c); ma
  - (c) o se tupe toe faafoi e oo atu i le \$5.7 miliona e totogi atu i Talā Samoa.
- (3) O le fua faatatau o fesuaiga o tupe mo le QSPE ua faatupulaia i tupe Ausetalia e ao ona faaliliuina i Tala Samoa e faapea: AUD \$1 = SAT \$0.5333.



- (4) So o se tupe faaalu mo faamoemoega o tinoitupe toe faafoi ua faatatauina i luga o faavae tau lafoga o oloa ma galuega faatino e faia i luga o aofaiga o tau (VAGST) e aofia ai tau faavae.

**5. Tuusaunoaga o lafoga o tupe maua:**

- (1) O tagata nei e tuusaunoa mai noataga mo lafoga o tupe maua i lalo o tulafono a Samoa i luga o so o se tupe maua mai o lo o maua i totonu o Samoa e ia tagata:
- (a) o se tagata faigaluega mai fafo a le Kamupani mai Fafo po o le Fesootaiga Fefaasoai o Faasalalauga; ma
  - (b) se tagata galue faakonekarate mai fafo atu o Samoa a le Kamupani mai Fafo po o le Fesootaiga Fefaasoai o Faasalalauga, e aofia ai so o se tagata o taitaia le faafiafiaga, tagata o auai po o le pulega.
- (2) E lē faaaogāina le faafuaiupu (1) i se tagata nofomau o lo o faafaigaluega po o galue faakonekarate mo le Kamupani i Totonu o le Atunuu po o le Kamupani mai Fafo.

**6. Tuusaunoaga o totogifuapauina mo galuega ma pemitā malaga:**

- (1) E mafai e le Minisita e fitoitonu ma Leipa ma sootaga tau galuega ona tuusaunoa totogifuapauina e totogi e le Kamupani mai Fafo, Fesootaiga Fefaasoai o Faasalalauga po o le Kamupani i Totonu o le Atunuu i lalo o lea Tulafono mo le talosaga po o le tuuina atu o pemitā malaga, e aunoa ma le faatapulaaina o le fuaiupu 79 o le Tulafono o Sootaga Va Lelei o Leipa ma Galuega 2013.
- (2) E mafai e le Minisita e fitoitonu ma le ulufale mai ona tuusaunoa totogifuapauina e totogi e le Kamupani mai Fafo, Fesootaiga Fefaasoai o Faasalalauga po o le Kamupani i Totonu o le Atunuu i lalo o lea Tulafono e faasino i le talosaga o le tuuina atu o visa nofomau lē tumau, e aunoa ma le faatapulaaina o le fuaiupu 48 o le Tulafono o le Ulufale mai o Tagata 2004,

- (3) E ao i le Kamupani mai Fafu ona:
- (a) faamaoti tagata faigaluega ma tagata e ala i o latou igoa atoa, faatasi ai ma auiliiliga o o latou tusi folau ma atunuu e omai ai i se faiga e tatau ai i le Minisita e fitoitonu ma leipa ma sootaga tau galuega; ma
  - (b) faamaoti tagata faigaluega ma tagata e ala i o latou igoa atoa, faatasi ai ma auiliiliga o o latou tusi folau ma atunuu e omai ai, i se faiga e tatau ai i le Minisita e fitoitonu ma le ulufale mai o tagata.

**7. Tuusaunoaga i oloa faaulufale mai:**

- (1) E tuusaunoa le Kamupani mai Fafu ma le Kamupani i Totonu o le Atunuu mai tiute i lalo o le Tulafono o Tiute 2014 mo oloa faaulufale mai ua taua i le Faamatalaga 2.
- (2) E mafai e le Minisita, e ala i se Faasilasilaga i le Savali ona teuteuina le lisi o oloa faaulufale mai o lo o taua i le Faamatalaga 2.
- (3) O le teuteuga i le Faamatalaga 2 i lalo o le faafuaiupu (2) o le a lē aafia ai tuusaunoaga o so o se oloa faaulufale mai ua aveeseina mai le Faamatalaga 2 ona o se taunuuga o le teuteuga.

### VAEGA 3 AIAIGA ESEESE

**8. Faatapulaaina o le faatauina atu po o le aveina atu faameaalofa o oloa faaulufale mai:**

E lē mafai ona faatauina atu po o le aveina atu faameaalofa oloa faaulufale mai a le Kamupani mai Fafo po o le Kamupani i Totonu o le Atunuu vagana ai o se faamaoniga tusitusia e tuuina atu muamua e le Ofisa Sili o Pulega:

- (a) o oloa ua tuuina atu mo faamoemoega o galuega fesoasoani faameaalofa; po o
- (b) tiute, e pei ona fuafuaina e le Ofisa Sili o Pulega e totoi atu i luga o tau aogā o oloa.

**9. Lipoti ma faamatalaga tau tupe:**

- (1) E ao i le Kamupani i Totonu o le Atunuu i le faaiuga o vaiaso tai 2 ina ua amata pueina le ata tifaga ona tuuina atu i le Ofisa Sili o Pulega se lipoti o tupe alu e ao ona sueina faasuetusi e le Ofisa Sili o Pulega.
- (2) E ao i le Ofisa Sili o Pulega ona saunia se lipoti faasuetusi e faavae i luga o tupe alu ua tuuina atu e faaalua ai pe o usitaia aiaiga o lenei Tulafono.
- (3) E ao i le Kamupani i Totonu o le Atunuu ona tali atu fesili uma ua tuuina atu i ai e le Ofisa Sili o Pulega e fesootai i le lipoti ma faamatalaga tau tupe, ma tuuina atu so o se isi lava pepa aloaia po o faamatalaga e mafai ona manaomia e le Ofisa Sili o Pulega.

**10. Teuteuga faatupulaia:**

I totonu o le faafuaiupu (1) o le Vaega A o le Faamatalaga 2 o le Tulafono o Lafoga o Tupe Maua 2012, i le faaiuga o le parakalafa (zc), ia suia le piriota i se semikolona, ma i le tuanai ai o lea parakalafa ia faaofi e faapea:

“(zd) se tagata o tuusaunoa mai lafoga i lalo o le fuaiupu 5 o le Tulafono o le Kamupani a le Landing Ltd 2016.”.

**11. Mutaaga o le Tulafono:**

- (1) E mafai e le Minisita, i le i ai faatasi ma le faamaoniga a le Kapeneta, e ala i se Faasilasilaga e lomia faasalalau i totonu o le Savali, ona filifili se aso e muta ai le aogā o lenei Tulafono i le taimi lava lea e maea ai le faamoemoega o lenei Tulafono ma usitaia ona aiaiga uma.
- (2) Afai e muta le aogā o lenei Tulafono, e soloia le parakalafa (zd) o le Vaega A o le Faamatalaga 2 o le Tulafono o Lafoga o Tupe Maua 2012 mai le aso e muta ai le aogā.

## FAAMATALAGA 1

### (Fuaiupu 2)

#### TUPE ALU FAAPITOA UA ILOILOINA (QSPE)

**1. Tupe alu mo atinae:**

O tupe alu i atinae e pei o le fuaina o le nofoaga, ata o le oototoga o le pueina o le ata tifaga, tusitusiga o oototoga o le tala, suesuega e faia i totonu o Samoa.

**2. Pule tau fatuga:**

O le mauaina mai o le pule tau fatuga po o le laiseneina o le pule tau fatuga i se galuega e maua muamua mai mo le faaaogāina i le pueina o le ata pe afai o lea tulaga o lo o umia e se tagata nofomau i Samoa.

**3. Inisiua:**

O tupe alu i faiga faavae tau inisiua ia e manaomia mo le faia o le galuega tau atinae i le nofoaga o lo o tuuina atu ai le auaunaga i totonu o Samoa. Mo se faataitaiga, o inisiua mo meafaitino e faaaogā i le pueina o le ata, nofoaga o pueina ai, lavalava e faaaogā e i latou o auai i le pueina o le ata, gataifale, felauaiga, vaalele, meafaigaluega eseese, inisiua tau noataga o tagata lautele.

**4. Faalauiloaina:**

O tupe alu mo galuega faalauiloa ma le uunaia pe afai ua faatupulaia e le Kamupani mai Fafo, a o le i maea le pueina o le ata ma le pule tau fatuga i meafaitino o faalauiloa ai, o lo o umia lea e se tagata o nofomau i Samoa, ma e aofia ai se kamupani i totonu o le atunuu.

**5. Tupe Faaalu mo Loia:**

O tupe alu ua faatupulaia e tusa ai ma auaunaga e faatino e se ofisa loia i totonu o Samoa a o faagasolo le pueina o le ata tifaga. O ia auaunaga o le a manaomia le taua tele i gaioiga o le pueina o le ata, mo se faataitaiga, o le

faatuina o le Kamupani i Totonu o le Atunuu, faia o konekarate a tagata faigaluega, faamaoniga o musika ma faatinoga, inisiua ma maliega faalisi.

**6. Sueina Faasuetusi ma Faamatalaga Tau Tupe:**

O tupe alu ua faatupulaia e tusa ai ma auaunaga e faatino e ofisa loia i totonu o Samoa a o faagasolo le pueina o le ata tifaga.

**7. Pasese o vaalele:**

E 100% le totoi o pasese e toe foi ai na o tagata mai fafo o lo o auai i le faatinoina o vaega o le ata tifaga e malaga ai i le Ofisa o Vaalele o le Virgin. Afai o lo o malaga mai nisi o tagata mai fafo o lo o auai i le faatinoina o vaega o le ata i so o se vaalele e le o se vaalele o le Ofisa o Vaalele a le Virgin, e na o le 50% o tupe alu faatupulaia o pasese e toe foi ai e totogiina e le QSPE.

**8. Felauaiga:**

O tupe alu e totogi ai meataitasi e felauai mai i Samoa e manaomia mo le pueina o le ata faasolo o le televise.

**9. Laei, o mea e teuteu e faalalelei ai tagata o lo o faatinoina vaega o le ata, mamanu o le nofoaga autu e pueina ai le ata:**

O tupe alu e faatupulaia i le faatauina mai o laei, mea e teuteu e faalalelei ai foliga o tagata o lo o faatinoina vaega o le ata ma meatotino o le nofoaga autu e pueina ai le ata ia o le a faaaogā mo le pueina o le ata.

**10. Lisiina o mea pueata ma meafaigaluega mo le pueina o le ata tifaga:**

O le tupe o tau o le lisiina o meapueata ma meafaigaluega e pueina ai le ata tifaga mai fafo atu o Samoa pe afai e le o maua ia meafaitino i totonu o Samoa.

- 11. Tagata o lo o Aofia ai i le Pueina o le Ata Mai Totonu o le Atunuu:**  
O tupe alu i totogi mo tagata e nofomau i le atunuu e faafaigaluega po o le galulue faakonekarate mo le Kamupani i totonu o le Atunuu po o auaunaga ma galuega e faatino i totonu o Samoa, e aofia ai tupe totogi e fesootai ma tau o leipa (faamanuiaga faaopoopo).
  
- 12. Tagata o lo o Aofia ai i le Pueina o le Ata Mai Atunuu i Fafu:**  
O tupe totogi mo tagata o lo o aofia ai i le pueina o le ata e faafaigaluega pe galulue faakonekarate mo le Kamupani mai Fafu mo galuega ma auaunaga e faatino i totonu o Samoa.

## **FAAMATALAGA 2**

**(Fuaiupu 7)**

### **OLOA FAAULUFALE MAI**

O oloa e faaaogā ma lafoai e aofia ai meafaitino e faaaogā ma lafoai mo mea pueata, maa uila, mea e faaaogā faapitoa mo teuga e pei o vailaau eseese mo le teuteuina o foliga ia lalelei, kulū e faapipii ai, masini e faamaumau ai fao, maea, seevae uumi e faaaogā e alii, nisi meaai (e le o maua i totonu o le atunuu), tusi faapitoa mo le faamauina o mea e pei o “api laiti mo faamaumauga e lē susū pe a timuga” ma peni, pusa vaitusi e faapitoa mo galuega lolomi, ofu e puipui ai; masini ma vaega mo afi e faaaogā mo le pueina o le ata; meafaigaluega e alu i eletise e le toe aogā pe a uma ona faaaogā, meafaitino eseese faapitoa e lafoai pe a maea ona pueina le ata tifaga.

---